



L'an 2119 in terra rumauntscha

A sclingia. Chi am sdasda da quistas uras? Quist telefon schmaladiu! Eau cuor giò da schela. Ün da noss chindels sbegla, intaunt ch'eu pigl giò il telefon. Üna duonna am quinta qualchosa cun tun agito, ma eau nun incleg zist segn da Dieu, perche cha Riet sbregia scu ün mez nar. Eau schlavaz il telefon sün maisa e sbreg: "Ma tascha giò, Riet, ün hom da tschinch ans nu crida pü!" La duonna al telefon dumanda: "Es El auncha cò?" Eau pigl darcho in maun il telefon e la duonna am quinta plain agitaziun...

Eau nu di pü ünguotta, pend sü il telefon e vegn a'm trer aint. Mia duonna vain aint da porta e'm dumanda chi chi hegia telefono.

La pulizia.

John es gnieu mordragio.

Eau stögl ir dalum tal post da pulizia, perche ch'eu d'he gieu da chefer fich bger cun John düraunt las ultimas eivnas.

La pulizia ho managio ch'eu stögli eir gnir, perche ch'eu d'eira involvo cun el tar las tschernas.

Mia duonna am do üna brancleda, eau vegn giò'n gardaroba, tir aint la giacca e vegn in garascha, impiz l'auto e part vers il post da pulizia.

John, Rafael ed eau füssans stos tuots trais ils favorits, uossa cha sun alura tschernas.

George Cavelti, il bap da John e president actuel da la Lia Rumantscha es in carica daspö 42 ans, daspö cha sieu bap, il non da John, es mort. Uossa ho George 82 ans e schmetta scu president. Que as so cha eir sieu figl John ho noschas intenziuns pel rumauntsch, precis scu sieu bap George. Bap e figl haun nempe la visiun inglaisa.

Iffaunts e famiglias cun noms inglais.

Famiglias cul nom Caratsch dvaintan la famiglia Kärych.

Gian dvainta John.

Be auncha paginas d'internet inglaisas.

A vain discurrieu be auncha inglais.

A scoula.

In butia.

Sün via.

In famiglia.

La Lia Rumantscha dvainta la Lia inglesa.

George ho fat tuot per cha sieu figl vegna elet e sieus böts, plauns e sias visiuns s'accumpleschan. Ma uossa es John mort.

Eau riv tal post da pulizia e sort da l'auto. Eau evr la porta e chamin in direcziun da la recepziun, lo spetta eir già Rafael. Ün pulizist ans dumanda: "Sun Els sar Corsin Caratsch e sar Rafael Engist? Ch'Els am seguan."

Nus rivains in ün staunzin plain cameras. Ün pulizist ans fo dumandas. Zieva l'interrogaziun poss eau darcho ir a chesa, ma Rafael stu ster lo auncha pü lönch.

Ho Rafael mordragio a John?

Eau evr la porta da mieu bel Fiatin 500, ün'antiquited dal tschientiner passo.

Cur ch'eau riv a chesa, pigli our il painch e la cocomass - üna nouv'invenziun da l'an passo - e strich que sülla fletta da paun. Melapaina cumanzo a manger tschaina, sclingia il telefon. Ad es darcho la pulizia. A vöglian ch'eau vegna darcho sül post. Dimena darcho in viedi cun mieu Fiatin.

Cur ch'eau riv tal post da pulizia, am spettan già duos pulizists.

Els am dian ch'eau stögliia rester cò. Eau als dumand perche ed els am respuondan cun tun sever: "Que so El meglder cu nus!" Eau nun incleg pü ünguotta. Sainza dir pled am mainane in üna stanza.

Lo vezzi sün üna maisa mieu iPhone 79 e mia carta d'identited ch'eau tscherch daspö her. Ün pulizist am dumanda sch'eau hegia forsa pers quista roba illa chesa da John. Eau nun incleg üna pipa tabac e cumainz a gnir gniervus. Ün pulizist disch ch'eau stögliia ster cò fin cha'l cas saja sclarieu.

Il pulizist am maina in ün sgrattatschêl. Mia cella es süsom il sgrattatschêl in üna chambra da vaider, inua cha tuots vezzan mincha movimaint e tuot que ch'eau fatsch

sün ün grand monitor. Eau am saint enormamaing observo e cuc da davousvi sur la cited, aunz ch’eau m’indruminz da spür stanglantüna.

Cur cha alva il sulagl, am vegnan duos pulizists a piglier our da la cella da vaider. Els am dian ch’eau possa ir darcho a chesa, ch’eau stögla be auncha fer ün discuors finel cun Rafael. Ils pulizists am mainan illa staunza d’interrogaziun. Lo spetta Rafael con üna vista grittischma ed il schef da la pulizia Bernina. Eau am tschaint. Il schef disch: “Nus vains quista not scuvier cha Rafael ho mordragio a John, sül curtè da chadafö – l’arma dal mordrarettsch - vainsa chatto la DNA da Rafael!”

Rafael sbregia plain fotta: “George ho guardo e fat tuot per cha John vegna elet scu president! Eau nu d’he pü supporto quello! Sterzas saira d’he eau invulo scu prüm il telefon e la carta dad el”, Rafael muossa cul daunt sün me, “e zieva d’heja cuppo a John, a quist intrigant inglais schmaladiu!” Il schef da la pulizia am disch: “Eau am s-chüs tar El, sar Corsin, ch’eau L’he inculpo! El po ir a chesa.”

Rafael ho da rester cò e po passer il prossem 45 ans in quista cella da vaider sgrischaivla.

Uossa suni persvas ch’eau gnaro tschernieu scu prossem president da la Lia Rumantscha.

Flurin Salzgeber, avrigl 2019